

Na osnovu člana 5. stav 2. tačka 3. Zakona o internoj reviziji u javnom sektoru u Federaciji Bosne i Hercegovine („Službene novine Federacije BiH“, broj 47/08), Koordinacioni odbor centralnih harmonizacijskih jedinica u Bosni i Hercegovini usvaja sljedeći:

ETIČKI KODEKS / KODEKS

PROFESIONALNE ETIKE ZA INTERNE REVIZORE U FEDERACIJI BIH

U V O D

Svrha Etičkog kodeksa / Kodeksa profesionalne etike, jeste da promoviše etičku kulturu u profesiji interne revizije.

Etički kodeks je neophodan i prikladan za profesiju interne revizije koja se zasniva na povjerenju u objektivna uveravanja o upravljanju rizikom, sistemima kontrole i rukovođenju. Djelokrug Etičkog kodeksa je širi od definicije interne revizije tako da obuhvata i dvije suštinske komponente:

- principe koji su relevantni za profesiju i praksu interne revizije,
- pravila ponašanja kojima se opisuju norme ponašanja koje se očekuje od internih revizora. Ova pravila pružaju pomoć kod tumačenja principa za praktične primjene i namjenjene su da budu vodič za etičko ponašanje internih revizora.

PRIMJENA I SPROVOĐENJE

Kodeks se odnosi na zaposlene koji obavljaju poslove interne revizije u javnom sektoru.

Povrede Etičkog kodeksa se procjenjuju i rješavaju u skladu sa nadležnim propisima i administrativnim procedurama. Nepoštovanje etičkih zahtjeva koji su ovdje navedeni vodi pokretanju odgovarajućih zakonskih postupaka protiv zaposlenih u službi interne revizije.

PRINCIPI I PRAVILA PONAŠANJA

Od internih revizora se očekuje da primjenjuju i poštuju sledeće principe i pravila ponašanja:

Integritet

Princip

Integritet internih revizora zasniva se na njihovu poštenju i čestitosti u obavljanju poslova, što je čvrsta osnova za uspostavljanje povjerenje u poslove unutarne revizije.

Pravila integriteta koja moraju poštovati interni revizori:

- obavljati rad pošteno, vrijedno i odgovorno,
- poštovati zakonske propise i objelodaniti činjenice onako kako se očekuje u skladu sa propisima i profesijom,
- ne učestvovati svjesno u bilo kakvoj kriminalnoj radnji, niti učestvovati u djelima koja diskredituju profesiju interne revizije ili organizaciju / instituciju,
- poštovati i doprinositi legitimnim i etičkim ciljevima organizacije / institucije .

Kompetentnost

Princip

Od internih revizora zahtijeva se da poslove obavljaju stručno te da posjeduju znanja, vještine i iskustvo potrebno za obavljanje poslova unutarnje revizije.

Pravila kompetentnosti koja interni revizori moraju poštovati:

- pružati samo one usluge za koje imaju potrebna znanja, vještine i iskustvo.
- pružati usluge interne revizije u skladu sa relevantnim propisima (zakonima, pravilnicima, priručnicima...) koji su zasnovani na Standardima interne revizije.
- kontinuirano unapređivati svoju stručnost, efektivnost, kao i kvalitet svojih usluga.

Objektivnost

Princip

Od internih revizora očekuje se da posjeduju najveći nivo profesionalne objektivnosti. Objektivnost, a isto tako i nepristranost, nužna je pri sastavljanju revizorskog izvješća. Pri donošenju prosudbi te davanju stručnog mišljenja i preporuka interni revizori ne smiju biti ni pod kakvim neprimjerenim uticajem sopstvenih ili tuđih interesa. Interni revizori predočuju na najobjektivniji mogući način nalaze i mišljenja, pritome procjenjujući informacije i podatke o zadanim aktivnostima i procesima.

Pravila objektivnosti koja interni revizori moraju poštovati:

- Da nisu umješani u bilo kakve radnje ili odnose koji mogu da ometaju ili se pretpostavlja da mogu ugroziti nepristrasnost procjene. Ovo učestvovanje uključuje one aktivnosti ili odnos koji mogu da budu u suprotnosti sa interesima organizacije / institucije.
- Da ne prihvataju ništa što može da ometa njihovo profesionalno rasuđivanje ili da izazovu pretpostavku da ga ometa.
- Da iznose sve materijalne činjenice koje su im poznate, a koje bi, ako ne bi bile iznesene, mogle da iskrive izveštavanje o aktivnostima koja je predmet pregleda.

Poverljivost

Princip

Interni revizori poštuju vrijednost i vlasništvo informacija koje dobijaju i ove informacije ne objelodanjuju bez odgovarajućeg ovlašćenja, osim u slučaju kada za to postoji zakonska ili profesionalna obaveza

Pravila poverljivosti koja interni revizori moraju poštovati:

- poštovati poverljivost podataka i informacija prikupljenih u svom radu, ne smiju ih koristiti u privatne svrhe ili na način koji nije u skladu s propisima o tajnosti podataka i pravu na pristup informacijama ili s međunarodnim revizijskim standardima za internu reviziju,
- biti oprezni u korištenju i zaštiti podataka koji su im stavljani na raspolaganje pri obavljanju revizije.

Stupanje na snagu

Ovaj Etički kodeks stupa na snagu narednog dana od dana objavljivanja u „Službenim novinama Federacije BiH“.

Broj: _____

Datum: _____

Predsjedavajući
Kordinacionionog odbora
Centralnih harmonizacijskih jedinica u BiH
